

Педагогикалық кеңестің қызметі туралы ереже

1. Жалпы ережелер

1.1. Осы ереже Қазақстан Республикасының «Білім туралы» Заңына, Қазақстан Республикасының Білім және Ғылым министрінің 2007 жылғы 24 қазанындағы № 506 бұйрығымен бекітілген (жаңа редакцияда 2015 жылғы 12 қарашасындағы № 643 бұйрық) «Техникалық және кәсіптік орта білімнен кейінгі білім беру ұйымдарының педагогикалық кеңесінің жұмысын ұйымдастырудың үлгілік қағидаларын бекіту туралы, бұйрығына сәйкес құрастырылған.

2. Педагогикалық кеңестің міндеттері

2. Педагогикалық кеңестің міндеттері:

1) білім беру ұйымдарындағы оқу-тәрбие процесінің жағдайын, оқытушылардың кәсіби даярлық деңгейін, білім беру ұйымдарында білім алушылардың білімділігін, тәрбиелілігін және дамуын диагностикалау;

2) білім беру ұйымдары дамуының, кәсіби шеберлігінің және әрбір оқытушы мен өндірістік оқыту шеберінің шығармашылығының кешенді нысаналы бағдарламаларын әзірлеу;

3) сапалы оқу-тәрбие жұмыстары үшін білім беру ұйымы ұжымының күшін біріктіру;

4) республика экономикасының даму перспективаларын, еңбек рыногының қажеттілігін ескеріп, кадрларды даярлаудың сапасын әрдайым жетілдіру үшін жағдайлар жасау;

5) білім алушыларды тұлғалық бағытталған біліммен және тәрбиемен қамтамасыз ету;

6) білім беру ұйымдарының оқу-тәрбие процесін ұйымдастыруда құзіретті көзқарасты қалыптастыру;

7) оқу-тәрбие процесінің нәтижелігі мен тиімділігі мониторингісінің нысандары мен әдістерін жетілдіру;

8) білім беру ұйымдарында оқу-тәрбие процесін ұйымдастырудағы шығармашылық көзқарасты қамтамасыз ету болып табылады.

3. Педагогикалық кеңестің құрамы

3.1. Білім беру ұйымының педагогикалық кеңесінің құрамына кіреді:

- білім беру ұйымын басқарушылар өкілдері;
- оқытушылар;
- әлеуметтік серіктестіктер өкілдері;
- жастар ісі бойынша комитеттің мүшесі;
- ата-аналар жұртшылығының өкілдері.

3.2. Педагогикалық кеңестің құрамы білім беру ұйымы басшысының бұйрығымен оқу жылына бекітіледі.

3.3. Білім беру ұйымының басшысы педагогикалық кеңестің төрағасы болып табылады.

3.4. Педагогикалық кеңестің төрағасы жалпы басшылықты жүзеге асырады, мәжілістерде төрағалық етеді, қабылданған шешімдерді бекітеді. Педагогикалық кеңес мүшелерінің қатарынан ашық дауыс беру арқылы хатшы сайланады.

4. Педагогикалық кеңестің құқықтары

4.1. Педагогикалық кеңес:

- техникалық және кәсіптік, орта білімнен кейінгі білімі бар кадрларды даярлау жөніндегі нормативтік құқықтық актілерді және құқықтық актілерді орындау бойынша іс-шараларды;
- оқу-тәрбиелік және әдістемелік жұмыстардың жағдайын, оқытудың барлық нысандары бойынша оқыту әдістерін жетілдіру мәселелерін, оқытудың жаңа технологияларын енгізуді (ақпараттық, модульді, тұлғалық бағдарланған және тағы басқалар);
- оқу-көмекші бөлімшелердің, бөлім жұмысының жағдайын;
- білім беру ұйымдарының оқу-материалдық базасының дамуын жоспарлау мәселелерін;
- оқу-тәрбиелік және әдістемелік жұмыстарды жоспарлау мәселелерін;
- басшылардың, оқытушылардың, оқу-көмекші персоналдардың біліктілігін арттыру және біліктілік арттырудың жаңа нысандарын пайдалану мәселелерін;
- білім беру ұйымында жаңа мамандықтар мен пәндер бойынша оқытушыларды, оқытушылар құрамын даярлауды, жас мамандарды оқытушылық қызметке тартуды;
- басқарушы және педагогикалық кадрларды аттестаттауға даярлаудың аттестаттау жүйесін және ұйымдастыруды жетілдіру;
- білім алушыларды қабылдау, бітірушілерді бітірту және жұмысқа орналастыру мәселелерін;
- білім алушылардың үлгеріміне ағымдық бақылау, аралық және қорытынды аттестаттау, дипломдық жұмыстарын (жобаларын) қорғауға даярлау және өткізу бойынша іс-шараларды;
- білім алушылардың өндірістік практикасын ұйымдастыру және өткізу мәселелерін;
- білім алушылардың тәртібінің жай-күйін, үлгермегені үшін, жатақханадағы ішкі тәртіп және тұру ережелерін бұзғаны үшін оқудан шығару мәселелері, сондай-ақ жеке жағдайларда білім алушыларды білім беру ұйымдарына қайта қабылдау мәселелерін;
- оқу-тәрбие процестерін компьютерлеудің жай-күйін;
- білім алушылар контингентінің сақталуын;
- білім алушылардың тұлғалық бағдарланған тәрбиесі мен білімінің мәселелерін;
- республиканың еңбек рыногының талаптарына және экономиканың дамуының перспективаларына сәйкес кадрларды даярлау мәселелерін қарастырады

4.2. Жеке жұмысшылардың біліктілігінің осы білім ұйымдарында орындалып жатқан жұмыстарына сәйкестігі туралы мәселелер, қажетті жағдайда, педагогикалық кеңесте қарауға ұсынылады.

4.3 Педагогикалық кеңестің отырысында қызметі талқыланатын білім беру ұйымының қызметкерлері педагогикалық кеңестің отырысына қатысуға құқығы бар. Отырыстың өту күні туралы қызметкерлерге кемінде жеті күн бұрын хабарланады.

5. Педагогикалық кеңес жұмысын ұйымдастырудың тәртібі

5.1 Педагогикалық кеңестің жұмысы оқу жылына әзірленетін жоспар бойынша өткізіледі, педагогикалық кеңестің отырысында қаралады және білім беру ұйымының басшысымен бекітіледі.

5.2. Педагогикалық кеңес білім беру ұйымының басшысы белгілеген

мерзімде екі айда бір рет өткізіледі. Оқу үдерісінің графигіне сәйкес мамандықтар бойынша оқу апталары әртүрлі мерзімде аяқталуына байланысты оқу аптасы аяқталған топтардағы білім алушыларды аралық аттестаттауға жіберу мәселелері сол мезетте шешілу қажет болғандықтан колледжде кіші педагогикалық кеңес өткізу қарастырылған. Педагогикалық кеңестің отырысында талқыланатын мәселелер бойынша орындау мерзімі мен орындауға жауапты тұлғалар көрсетілген шешім шығарылады.

5.3. Педагогикалық кеңестің шешімі жай дауыс берумен қабылданады және білім беру ұйымының басшысы бекіткеннен кейін күшіне енеді.

5.4. Педагогикалық кеңестің төрағасы қабылданған шешімдердің орындалуын жүйелі тексеруді ұйымдастыруға және тексеру қорытындысын педагогикалық кеңеске талқылауға салуға тиіс.

5.5. Педагогикалық кеңестің әрбір мүшесі кеңестің барлық отырысына қатысуға, оның жұмысына белсенді араласуға, жүктелген тапсырмаларды уақытылы және нақты орындауға тиісті.

5.6. Педагогикалық кеңестің отырысы хаттамамен ресімделеді. Хаттамаға педагогикалық кеңестің төрағасы мен хатшысы қол қояды.

5.7. Әрбір хаттамада оның нөмірі, кеңес отырысының күні, қатысқандардың саны, отырыстың күн тәртібі көрсетіледі. Талқыланатын мәселе бойынша сөйлеген сөздер мен қабылданған шешім анық және түсінікті жазылуы керек.

5.8. Педагогикалық кеңес отырысының хаттамасы білім беру ұйымдарының іс номенклатурасында үнемі сақталатын құжаттар болып табылады және білім беру ұйымдарының істерін қабылдау мен тапсыру кезінде акт бойынша тапсырылады.